



DEO OPTIMO MAX.

UNI ET TRINO,

VIRGINI DEI-PARÆ, ET S. LUÇÆ,

Orthodoxorum Medicorum Patrono.

QUÆSTIO MEDICA.

QUOD LIBETARIIS DISPUTATIONIBUS,

*manè discutienda, in Scholis Medicorum, die Jovis decimo-tertio  
mensis Januarii, anno Domini M. DCC. LII.*

M. GUILLELMO DE MAGNY,

Doctore Medico, Præside.

*An à vāſorum auctā aut imminutā irritabilitate omnis morbus?*

I.



ATURA corporis, inquit Hippocrates, principium sermonis in arte Medicā. Hinc prout Medicus illam probè noverit, eò faciliùs causas morborum evolver & longè tutiùs ac certiùs remedia ab experientiā indicata adhibebit. Hæc prima sunt Medicinæ limina, diu multumque iis terenda, qui ejus adyta pene-

A

trare volunt ; si quis enim , hujusce cognitionis expertus , Medicum nomen usurpat morbisque vult mederi , haud ab similibus est ei qui machinae cujuscunque fabricae imperitus , ejus inordinatos motus turbataque organa restituere vellet. Nec ab illa recedunt sententia Medici omnes qui rationalem professi sunt Medicinam.

(a) Lib. 1.  
& 1.

*Neque enim hi crediderunt ut testatur Celsus , (a) posse cum scire quo modo morbos curare conveniat , qui unde hi sint ignoret. Eum vero dixere curaturum quem prima origo causa non fecisset , cum curari id quod aegrum est non possit ab eo qui quid sit ignoret.* Hinc vitae & sanitatis instrumenta causaeque Medico sedulo investigandae. Porro nihil aliud praese fert humana machina , nisi liquoribus irriguam tubulorum compagem ; quamdiu in sese impingunt invicem , tamdiu stat vita : haec igitur consistit in reciproco solidorum fluidorumque motu ac proinde illius instrumenta solida sunt & fluida. Quanam vero requirantur conditiones in solidis & in fluidis , ut peragatur ille motus , extricare non adeo pronum est ; rerum enim quae sunt in corpore ita abstrusa est indagatio , ut nunquam nisi a posteriori valeamus illas detegere ; ab effectibus igitur , ut illa pateat veritas , nobis est procedendum : in illo motu videre est vasa extendi & contrahi , necnon quod maximi momenti est eorum contractionem ultra aequilibrii gradum progredi ac proinde fluida hujusce contractionis ope promoveri. Vasa igitur debent esse flexilia simul & contractilia ut liquida propellantur. Verum unde nam repetenda sit vasorum contractio plurimum ambigitur. Ne credas , ut plurimi , ab elatere quo vasa pollent illam esse deducendam. Si enim vasorum contractio esset tantummodo elastica , nedum superaret aequilibrii gradum , immo vix attingeret illum terminum ; nullum enim corpus nobis compertum est , quod perfectum sibi vindicet elaterem ; aliunde ut illa fiat restitutio in corpore elastico debet prius removeri causa distensiva , aliter semper in nisu maneret , cum vero illa causa distendens non possit removeri , nisi posita contractione , satis evidenter apparet vasorum contractionem ab elatere non esse repetendam. Eruenda est igitur illa causa ex partium fabrica. Vasa duplici constantur partium genere , textu nimirum cellulari & fibris nervis , quarum extrema prominent in interiori vasorum superficie & tomentum dicuntur. Hanc sententiam de textu vasorum comprobant autopsia experimentis fulcita ; 1<sup>o</sup> quidem nervos ad vasa propagari , distribui & illorum compositionem ingredi uno

ore fatentur omnes, & ut cæteras omittam distributiones, nemo est inter anatomicos qui dissentiat nervos octavi paris ad carotides, ad aortæ principium, & ad arteriam pulmonalem distribui, nervum intercostalem aortæ descendenti nervos satis conspicuos suppeditare; aliundè comprobant experimenta membranas arteriarum nihil aliud esse præter textum cellularem, macerata enim in folia discerpuntur, pariter si leviusculum tunicis arteriarum vulnus infligatur & flamen ope siphunculi prudenter adigatur protinùs inflantur illæ cellulæ atque tument. Hinc forsitan non immeritò diceret, vasa ex nervis efformari, ita ut nervorum integumenta, quæ debent spectari tanquam textus cellularis propriè dictus, in vasorum membranas abeant, dum pars medullosa in papillas exurgeret in parte internâ vasorum, vasa igitur sic constructa sensibilitate donari, & quidem satis exquisitâ, perspicuum est. Sensibilitas enim juxta receptam opinionem à nervis præsertim nudis est repetenda; verùm positâ illâ sensibilitate facillè admodum in contractionem rapiuntur vasa, etenim ubi primùm aderit causa excitans, villi vasorum convelluntur ac proinde vasa contrahuntur & liquida compressa propellent. Modò verò probabimus illam vasorum sensibilitatem non esse hypotheticam. Cum autem illa contractio supponat aliud quo susci-  
tetur, illud nobis est inquirendum.

## I I.

**A**LIBI quàm in fluidis, causam, undè solidorum sensibilitas in actum deducitur, frustra investigabis, verùm quomodo illud fiat, hoc opus, hic labor est. An fluidorum moles? An eorum indoles? quamvis celeberrimus Boerhaavius litem dirimere videatur, dum pronuntiat causam undè sanguis propellitur in ipsâ mole non esse inquirendam, rem tamen altius scrutabimur. Vasorum contractio liquorum mole suscitari nequit, nisi in quantum vasa distendit; verùm si exindè deduceretur, vasorum actio foret in ratione quantitatis fluidorum ac proinde ubi major foret fluidorum quantitas, major etiam foret vasorum contractio: hæc vel illa fluidorum indoles minimè faceret ad illam contractionem, quod est omnino falsum; detractâ enim in morbis largâ sanguinis copiâ, sæpè fit ut adaugeatur illa contractio, aliundè nedum sanguinis copia contractioni faveat, immò sæpissimè illam reprimat & sistat: deindè in cacochymicis affectibus, in quibus turget ut plurimum plethora feri, adeò

debilis vasorum est contractio ut vix tactu percipi possit. Vasorum igitur contractio non est in ratione quantitatis fluidorum, sed in ratione eorum indolis. Mutata enim fluidorum indole mutatur & vasorum contractio. Si enim quâcumque de causâ accrescant humores, statim frequentius & vividius vasa contrahuntur; minuta autem fluidorum magis quam par est *εὐπερίεα* minuitur ad langorem usque vasorum contractio, quod evidens est in virginum chlorosi & in omnibus morbis ab exuperantiâ seri. Adde quod posita hac sententiâ experientia adeo congruâ, facillè admodum concipitur vasa tunc contrahi posse ultra æquilibrîi terminum. Cum verò singulâ systole non exinaniantur vasa, remanente contractionis causâ, in systole remanent, nisi à violentâ causâ ex illo statu disturbarentur; patet proinde solidorum diastolem à liquidis vi propulsis esse eruendam. His ritè ponderatis vitæ causæ in aprico collocantur. Vita enim juxta nostram hanc sententiam est perpetuum sensationis exercitium, cujus objectum sunt fluida stimulantia, organum verò sunt solida utpotè sensibilitate prædita, sed cum ad sensationis cujuscunque exercitium, prævia requiratur impulsio quâ objectum ad organum applicetur, ideo ad vitam constituendam non tantum requirebantur sensationis instrumenta, sed etiam hujus impulsione instrumentum; quapropter supremus naturæ Conditor in centro vasorum collocavit instrumentum, eor nempè fibris muscularibus contextum, cujus beneficio maxima vi protrusi liquores perfectè solidis applicantur, undè sensationis exercitium; liquidis enim sic propulsis vasa extenduntur, sicque sensibilia redduntur, ac proinde activæ fluidorum partes majori cum *εὐπερίεα* impingunt in villosam vasorum substantiam; hinc illorum in fluida reactio. Illud sanè considerantem rapit in admirationem, quod absque novo medio exerceatur illius musculi actio; ut enim stimulis vasorum villis in actum vasa deducuntur, sic nervis cordis, præsentia fluidi, contrectatis suscitatur illius contractio. Sed cum ad aliorum vasorum contractionem contactus liquorum non sufficiat, sed requiratur adhuc impulsio, fluida solidis applicans, desiderabatur instrumentum, quo propulsus sanguis cordi vivide applicatus, illius suscitaret actionem, cor enim non potest esse in se ipsum impulsione instrumentum; illud facile patebit attendenti quantum infringatur illa impulsio, dum fluida ex minori in majorem traduntur diametrum, ex arteriis nempè in venas, ideo videlicet extrema venarum, cordi vicina, si-

bris instruuntur muscularibus, quarum ea vis est, ut fluida validè propellant in cava cordis, ut illius suscitetur actio; illarum autem fibrarum actionis causa in ipsummet cor, repetenda venit, tùm à reliquis impulsione, liquidis à corde communicatæ, tùm longè magis ab impulsione sanguinis, dum corde contracto ex ventriculis in auriculam refluit, & vi satis validâ fibris modò dictis applicatur. Quomodo vita foveatur satis in propatulo est; dum enim impulsio quâ fluida solidis applicantur uniformis est & æquabilis, viget sanitas, vasa enim non vividius fluida premunt ac ipsa premuntur, fibræ nec laxitate, nec rigiditate nimia laborant, & fluida debitâ donantur temperie; verùm statim atque sensationis organum, objecto vividius languidiusve quàm par est afficitur, tunc in promptu est morbus, sæpè mortis prænuntius, destruuntur enim vel saltem læduntur sanitatis causæ.

### III.

**Q**UEMADMODUM in vasorum sensibilitate, vitæ causæ debent reponi, sic illam sensibilitatem ex fabricâ vasorum repetere non est incongruum; Zimmermannus (a) enim vasa esse irritabilia contendit, & experimentis suffultus hanc irritabilitatem præcipuè nervis perreptantibus deberi asserit; *in expirante cane*, inquit, *quiescentibus vasis, irritatis tum venosis tum arteriosis canalibus in parte illorum interiori, cum scalpello aut cum oleo vitrioli usque ad tertias illarum diametri sese contraxerunt arteriæ, venæ paulò minùs.* Cùm illa sensibilitas in actum deduci nequeat, nisi quatenus excitetur præsentia corporis stimulantis, & ad cuiusvis sensationis exercitium eadem requirantur, ideò vitalem motum, sensationis exercitium appellare non dubitamus. Illud autem clariùs innotescet perpendenti, nervos in vasis prominere sub formâ ad sensationem producendam aptissimâ: in parte enim vasorum interiori, sicut & in aliis locis in quibus sensationes sunt exercendæ, nervi sunt molles, pulposi, involucris orbatî; adeò autem necessaria est ad motum vitalem illa nervorum mollities, ut quâ ratione indurescunt nervi, eâ imminuatur vita & accedat senectus. Undenam enim potiùs repetenda senectus, nisi ex rigiditate & callositate, ut ita dicam, quam vasa sibi comparant ab impulsione fluidorum iterùm & iterùm repetitâ? Vitalis sanè motus longè citiùs decresceret & fatisceret, nisi prudenti naturæ consilio, mucagine vasa intus oblinirentur. Non minùs ab inertia defenduntur, dum stimulantiores evadunt corporis humo-

(a) Zimmermannus dissentat de irritabilitate.



res, quâ proportionē imminuitur papillarum sensibilitas: tunc enim obliteratis pro parte vasīs depuratoris, diutius intrâ vasa remanent liquida, hinc major illorum activitas. Maximâ igitur curâ cavendum est ne vividius afficiantur hæc organa, ut enim visus lumine vividiori, auditus sono acutiori læduntur, imò sæpè destruuntur, sic sanitas pellumruit, quando fluida vividius applicantur solidis; sic qui liquoribus ardentibus nimium indulgent, præmaturam accersunt senectutem.

## I V.

**V**ASORUM *irritabilitas* est illorum ad sensum habitas: excessu vel defectu potest depravari; hinc duplicis capax vitii; hoc utrumque vel est congenitum vel acquisitum; prius, temperamentum; posterius verò morbum constituit; si temperamentum, ad totum corpus pertinet; si verò morbus vel totum corpus vel peculiarem tantummodò partem afficit. Congenitum sensibilitatis vitium vel est exindè repetendum, quòd papillæ nerveæ nimis promineant, vel nimis deprimantur; majorem enim vel minorem indè deducunt corporis sensibilitatem omnes Physiologi. Inquinatæ verò sensibilitas duplici de causâ acquiritur depravatio; una interna, quæ intra vasa, altera externa, quæ extrâ vasa deprehenditur; internam constituit ipsiusmet sensationis objecti vitium, fluidorum nempe; si enim acriores vel abundantiores succi, nimis sensilitati ansam præbent; quæ nimis obtunditur, si vappescent humores, vel copiam deficient. Licet enim modo longè diverso agant & fluidorum indoles & illorum moles genuinam *irritabilitatem* depravando, æquè tamen partium lædunt temperiem; si enim adsit plethora, siue humorum peccet acrimonia, nimis æqualiter partium excitatur sensibilitas, in utroque enim casu occurrit & nimia partium tensio, & nimia fluidorum solidis applicatio; si corrugantur solida, maximus est attritus fluidorum ad solida; si exporrigantur vasa, magis prominent papillæ nerveæ, ac proindè fluidorum actioni suscipiendæ aptiores sunt; ergò res redit eòdem. Pari de ratione obtunditur vel extinguuntur vasorum sensilitas, siue molis defectu siue vappiditate peccent humores; cum enim partes sint sensiles in ratione tensionis, liquidò patet extensionis defectum, & minorem, quàm par est, liquorum copiam æquè sensilitatem obtundere, ac liquorum vappiditatem: depravatæ verò sensilitatis causæ externæ, sunt omnia quæ nervos exterius afficere valent, ut frigus, vulnèra, animi pathemata, compressio; ner-

7  
vos enim commovendo, organa vitæ maximè afficiunt, posito quòd enim ex contextu nervorum conflentur vasa, minimè mirum videbitur quòd hæc illorum motibus obsequantur. Exindè in propatulo est causa motûs submuscularis, adeò conspicua in affectibus animi; illæ autem causæ majorem sensibilitatis gradum fuscitant, vel illam prorsùs extinguunt, prout ipsæmet extenduntur; si enim validissimè agant, sensibilitatis ita obtunditur principium, ut prorsùs fatiscat & aboleatur solidorum oscillatio; tunc enim liquidi nervosi præpeditur appulsus: sic ex nimia compressione, nimio frigore, vividioribus animi pathematis vita subitò corruit, vel saltem maxima urget difficultas. Exindè igitur videre est motum vitalem æqualitèr fatiscere, sive sensibilitatis obtundatur principium & destruatür, sive ad partem non allabantur vel effati liquores ad illam appellant; patet indè ratio unde cor & alia corporis agentia sensum & motum amittant ligatis eorum nervis vel arteriis; sic, verbi gratiâ, ligatis nervis cardiacis, cor evadit paraliticum, haud secus ac ligatis arteriis coronariis; in priori enim casu destruitur sensibilitatis principium, in secundo verò causa illud principium excitans removetur.

¶  
**A**CCEDENTE unâ ex his causâ, gravissima nobis imminent mala. Ex nimia sensibilitate mobilior evadit tota nervorum compages, exquisitior fit sensus, impressiones quæ prius languide admodum corpus afficiebant, nunc molestè in idem agunt; fibræ enim vel nimiam patiuntur distensionem, & disruptionem minantur, vel corrugantur, & indè rigidiores factæ, vasa ad nimiam contractionem sollicitant, fluida nimis comprimuntur, suæ expansioni nimium renitentur vasa; hinc fluidorum solidis nimia applicatio & ingrata sensationis perceptio; ex infueto enim irritationis motu ardoris dolorisve sensu mens afficitur, quæ, vigente sanitate, vix quidquam eorum quæ in corpore peraguntur, percipere valer. Verùm si diutius & intensius adaugeantur causæ solidorum, *irritabilitatem* adaugentes, lethalis imminet catastrophiæ; ex vividiori enim concussu contunduntur & abraduntur vasorum papillæ, illarumque destruitur mollities, nervosis partibus adeò necessaria, ut sua adimpleant munia, hinc vasa debilitantur, ac tandem perit eorum actio; hinc mors brevè subsequitur. Quando vehementius urgent symptomata, exindè subnascuntur pulsus durus, renitens, frequens, calor, dolor, liquorum stasis, phlogoses, tumores, abscessus, gangrenæ; exindè pa-

riter phrenetides, pleuritides, nephretides, quorum omnium causa in nimia fibrarum irritatione merito reponenda venit. Nec minus vitæ functionibus ritè peragendis adversatur nimis imminuta vasorum *irritabilitas*; ex illo enim vitio sobolescit solidorum laxitas, ac proinde eorum debilitas, debilius igitur contrahuntur, segnius peragitur humorum motus, lentior fit sanguinea moles, tardius & in quantitate minori secernuntur spiritus animales, nec mirum si torpescant corporis functiones; chylus inde mutuatur labem, nec fit accurata sanguinis & cæterorum liquorum miscela, vitalis laticis sales & sulphura ab invicem sese expediunt, & in varia concreta facecunt, quæ huc & illuc appulsa, obstructions & tumores procreant; serum stagnat, undeque effluit, hinc œdema, anasarca, leucophlegmatia, hydrops & omnes morbi ab exuperantiâ feri; pariter exinde nascuntur soporosi affectus, sensuum hebetudo, humorum spontanea corruptio, & alia numero infinita ex eadem causâ, scilicet ex imminutâ vasorum sensibilitate, quæ quidem si conjungantur cum illis quæ prodeunt ex nimia solidorum *irritabilitate*, omne morborum genus absolvunt.

*Ergò à vasorum autâ aut imminutâ irritabilitate omnis morbus,*

#### DOMINI DOCTORES DISPUTATURI.

<i>M. Carolus Geillo de S. Leger.</i>	<i>M. Joannes - Franciscus Clemens Morand, Regia Societatis Lugdunensis socius.</i>	<i>M. Laurentius Ferret.</i>
<i>M. Jacobus - Ludovicus Aleaume.</i>	<i>M. Martinus Nouguez.</i>	<i>N. Joannes - Jacobus Belleste, Scholarum Professor designatus.</i>
<i>M. Clandius-Franciscus Grandclaus, Stanislai Poloniarum Regis, Lotharingie &amp; Barrensis Consiliarius &amp; Medicus.</i>	<i>M. Ludovicus-Alexander Gervaise.</i>	<i>M. Michael - Philippus Bouvart, Professor Regius, &amp; Regia Scientiarum Academia Socius.</i>

Proponebat Parisiis JACOBUS GOURLEZ DE LA MOTTE,  
Parisiinus, Saluberrimæ Facultatis Medicinæ Parisiensis  
Baccalaureus, A. R. S. H. 1752, A SEXTA AD MERIDIEM.